

ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆ
ԻՐԱՎԱԳԻՏՈՒԹՅԱՆ ՖԱԿՈՒԼՏԵՏ

«Պետության և իրավունքի հիմունքներ»
առարկայից դպրոցականների օլիմպիադայի
ԳՐԱՎՈՐ ԱՌԱՋԱԴՐԱՆՔ (2024 թ.)

Կրթական

կազմակերպությունը _____

Ազգանուն _____

Անուն _____

Հայրանուն _____

Սիրելի աշակերտներ,

Գրավոր աշխատանքները բաղկացած են հետևյալ առաջադրանքներից (գնահատման ձևերը և միավորները տրված են հենց աշխատանքում)՝

1. Ընտրովի պատասխանով առաջադրանքներ՝ 1.1.-1.8. (ընդամենը 4 միավոր):
 2. Համապատասխանեցման առաջադրանքներ՝ 1-5. (ընդամենը 5 միավոր):
 3. Կառուցված պատասխանով առաջադրանքներ՝ 1- 4. (ընդամենը 4 միավոր):
 4. Գծապատկերի լրացում (3 միավոր):
 5. Շարադրանք (4 միավոր):
- Աշխատանքի ընդհանուր միավորային արժեքն է՝ 20:

1. Նշեք ճիշտ պատասխանը՝ ընդգծելով (յուրաքանչյուր ճիշտ պատասխանը գնահատվում է 0.5 միավոր).

1.1. Ստորև ներկայացված բնորոշումներից ո՞րն է ամրագրված ՀՀ Սահմանադրությամբ.

- ա) Հայաստանի Հանրապետությունում ինքնիշխանությունը պատկանում է ժողովրդին,
- բ) Հայաստանի Հանրապետությունում ինքնիշխանության կրողը ժողովուրդն է,
- գ) Հայաստանի Հանրապետությունում իշխանությունը պատկանում է ժողովրդին:

1.2. Պետական և տեղական ինքնակառավարման մարմիններն ու պաշտոնատար անձինք իրավասու են կատարելու միայն այնպիսի գործողություններ.

- ա) որոնց համար լիազորված են օրենքներով,
- բ) որոնց համար լիազորված են Սահմանադրությամբ կամ օրենքներով,
- գ) որոնք արգելված չեն Սահմանադրությամբ կամ օրենքներով:

1.3. Ստորև նշվածներից ո՞րն է հետևյալ մտքի շարունակությունը. «ընտրողի համար քվեարկության գաղտնիությունը ...».

- ա) միայն իրավունք է, բայց ոչ պարտականություն,
- բ) միայն ընտրական իրավունք է,
- գ) ոչ միայն իրավունք է, այլև պարտականություն:

1.4. Հայաստանի Հանրապետության արտաքին քաղաքականությունն իրականացվում է միջազգային իրավունքի հիման վրա՝ բոլոր պետությունների հետ.

- ա) բարիդրացիական, փոխշահավետ հարաբերություններ հաստատելու նպատակով,
- բ) բարիդրացիական, փոխշահավետ և դաշնակցային հարաբերություններ հաստատելու նպատակով,
- գ) փոխշահավետ և դաշնակցային հարաբերություններ հաստատելու նպատակով:

1.5. Ստորև թվարկվածներից որո՞նք են ճիշտ արտացոլում ժողովրդաիշխանության իրականացման ձևերը.

- ա) ներկայացուցչական, անուղղակի ժողովրդաիշխանություն,
- բ) անմիջական, ուղղակի ժողովրդաիշխանություն,
- գ) ներկայացուցչական և անմիջական ժողովրդաիշխանություն:

1.6. Հայաստանի Հանրապետության խորհրդանիշերն են.

- ա) Հայաստանի Հանրապետության դրոշմ, զինանշանը, օրհներգը և Սահմանադրությունը,
- բ) Հայաստանի Հանրապետության դրոշմ, զինանշանը, օրհներգը և մայրաքաղաքը,
- գ) Հայաստանի Հանրապետության դրոշմ, զինանշանը և օրհներգը:

1.7. Ստորև բերված դատողություններից որն է բնութագրում ընտրությունների ազատության սկզբունքը.

- ա) ընտրական հանձնաժողովներն անկախ են պետական մարմիններից,
- բ) ընտրությունները պարտադիր են և պարբերական,
- գ) ընտրողն ինքն է իր հայեցողությամբ կատարում ընտրությունը:

1.8. Օրենսդրական նախաձեռնության իրավունք ունեն.

- ա), Ազգային ժողովի պատգամավորները և Կառավարությունը,
- բ) Ազգային ժողովի պատգամավորները, Ազգային ժողովի խմբակցությունը և Կառավարությունը,
- գ) Ազգային ժողովի պատգամավորները, Ազգային ժողովի մշտական հանձնաժողովները և Կառավարությունը:

2. Համապատասխանեցրեք ստորև բերվող հասկացությունները դրանց նկարագրությունների կամ սահմանումների հետ (յուրաքանչյուր ճիշտ համապատասխանեցում գնահատվում է 1 միավոր).

ա) Պարտադիր կամ հարկադիր աշխատանքն արգելվում է	1. Պետական և տեղական ինքնակառավարման մարմիններն ու պաշտոնատար անձինք իրավասու են կատարելու միայն այնպիսի գործողություններ, որոնց համար լիազորված են Սահմանադրությամբ կամ օրենքներով:
բ) Մարդու ազատ գործելու իրավունքը	2. Հանցագործության համար մեղադրվողը համարվում է անմեղ, քանի դեռ նրա մեղքն ապացուցված չէ օրենքով սահմանված կարգով՝ դատարանի օրինական ուժի մեջ մտած դատավճռով:
գ) Ֆիզիկական և հոգեկան անձեռնմխելիության իրավունքը	3. Յուրաքանչյուր քաղաքացի պարտավոր է օրենքով սահմանված կարգով մասնակցել Հայաստանի Հանրապետության պաշտպանությանը:
դ) Անմեղության կանխավարկածի իրավունքը	4. Ոչ ոք չի կարող իր ազատ և հստակ արտահայտած համաձայնության ենթարկվել գիտական, բժշկական կամ այլ փորձերի:
ե) Օրինականության սահմանադրական սկզբունքը	5. Յուրաքանչյուր ոք ազատ է անելու այն ամենը, ինչը չի խախտում այլոց իրավունքները և չի հակասում Սահմանադրությանը և օրենքներին:

«ե»	«դ»	«ա»	«գ»	«բ»
1	2	3	4	5

3. Լրացրեք բաց թողած բառերը (յուրաքանչյուր ճիշտ պատասխան գնահատվում է 1 միավոր):

3.1. Կառավարությունը կազմված է վարչապետից, փոխվարչապետներից և նախարարներից:

3.2. Հայաստանի Հանրապետությունն ինքնիշխան, ժողովրդավարական, սոցիալական և իրավական պետություն է:

3.3. Օրենքները և ենթաօրենսդրական նորմատիվ իրավական ակտերն ուժի մեջ են մտնում օրենքով սահմանված կարգով հրապարակվելուց հետո:

3.4. Ընտրությունները ժողովրդի իշխանության դրսևորման անմիջական բարձրագույն ձևն են, որի միջոցով ժողովուրդն ուղղակիորեն մասնակցում է պետության կառավարմանը՝ ձևավորելով Ազգային ժողովը և տեղական ինքնակառավարման մարմինները:

4. Ստորև բերված աղյուսակում լրացրեք իրավական պետության հիմնական սկզբունքները: Միայն մեկ ճիշտ պատասխանը գնահատվում է 1 միավոր, երկու ճիշտ պատասխանը գնահատվում է 2 միավոր, երեքը՝ 3 միավոր:

Իրավական պետության հիմնական սկզբունքները		
<p><u>Մարդը բարձրագույն արժեք է: Մարդու անօտարելի արժանապատվությունն իր իրավունքների և ազատությունների անբակտելի հիմքն է</u></p>	<p><u>Հանրային իշխանությունը սահմանափակված է մարդու և քաղաքացու հիմնական իրավունքներով և ազատություններով՝ որպես անմիջականորեն գործող իրավունք</u></p>	<p><u>Սահմանադրությունն ունի բարձրագույն իրավաբանական ուժ: Օրենքները պետք է համապատասխանեն սահմանադրական օրենքներին, իսկ ենթաօրենսդրական նորմատիվ իրավական ակտերը՝ սահմանադրական օրենքներին և օրենքներին:</u></p>

5. Շարադրեք ժողովրդավարական ընտրությունների սկզբունքները հետևյալ սխեմայով՝ համընդհանուր ընտրություններ (1 միավոր), հավասար ընտրական իրավունք (1 միավոր), ուղղակի ընտրություններ (1 միավոր), գաղտնի քվեարկություն (1 միավոր):

Համընդհանուր ընտրություններ՝ Ընտրելու իրավունք ունեն ընտրության օրը 18 տարին լրացած ՀՀ քաղաքացիները: Տեղական ինքնակառավարման մարմինների ընտրությունների ժամանակ ընտրելու և ընտրվելու, տեղական հանրաքվեին մասնակցելու իրավունք ունեն ընտրության կամ հանրաքվեի օրը տասնութ տարին լրացած ՀՀ քաղաքացիները: Օրենքով կարող է սահմանվել ՀՀ քաղաքացիություն չունեցող անձանց՝ տեղական ինքնակառավարման մարմինների ընտրություններին և տեղական հանրաքվեներին մասնակցելու իրավունքը:

Ընտրելու և ընտրվելու, ինչպես նաև հանրաքվեին մասնակցելու իրավունք չունեն դատարանի՝ օրինական ուժի մեջ մտած վճռով անգործունակ ճանաչված, ինչպես նաև դիտավորությամբ կատարված ծանր հանցանքների համար օրինական ուժի մեջ մտած դատավճռով դատապարտված և պատիժը կրող անձինք: Ընտրվելու իրավունք չունեն նաև այլ հանցանքների համար օրինական ուժի մեջ մտած դատավճռով դատապարտված և պատիժը կրող անձինք:

Հավասար ընտրական իրավունք՝ 1. Ընտրողներն ընտրություններին մասնակցում են հավասար հիմունքներով: Յուրաքանչյուր ընտրող ունի միայն մեկ ձայն: Հանրային իշխանությունները հավասար պայմաններ են ապահովում ընտրողների ընտրական իրավունքի իրականացման համար: Ընտրողները, անկախ ազգությունից, ռասայից, սեռից, լեզվից, դավանանքից, քաղաքական կամ այլ հայացքներից, սոցիալական ծագումից, գույրային կամ այլ դրությունից, ընտրելու և ընտրվելու իրավունք ունեն:

Ուղղակի ընտրություններ՝ Ազգային ժողովը, տեղական ինքնակառավարման մարմինները, բացառությամբ համայնքների ավագանիների կողմից ընտրվող համայնքների ղեկավարների, ընտրվում են անմիջականորեն՝ ընտրողների կողմից:

Գաղտնի քվեարկություն՝ Քվեարկությունը գաղտնի է: Ընտրողի համար քվեարկության գաղտնիությունը ոչ միայն իրավունք է, այլև պարտականություն: Ընտրողի կամքի ազատ արտահայտման նկատմամբ վերահսկողությունն արգելվում է:

**ԵՊՀ իրավագիտության ֆակուլտետի
Պետության և իրավունքի տեսության ու պատմության
ամբիոնի վարիչ, իրավաբանական գիտությունների
դոկտոր, պրոֆեսոր**

Գևորգ Դանիելյան